

武

備

志

武備志卷一百五十七

防風茅元儀輯

占度載

占丁

占星四

星變一

金

木

水

火

土

歲

熒惑

填

太白

辰

凡五星、木近日則遲、遠日則疾、火近日則疾、遠日則遲、上平行無太遲疾、金水附日而行、此大槩也、

凡五星東行爲順、西行爲逆、超舍而前爲盈、退舍而後爲縮、又云失次、上至三宿曰盈、躁急之象也、失次而下二三宿爲縮、畏退之象也、光而明滅不定曰動、不安之象也、光明出生鋒曰芒、芒長四出曰角、長而偏出曰彗、芒謂之正旗、正旗所指者受殃、戰則順旗所指者勝、

凡五星同度相及者曰合、又曰相去一尺內曰合、一曰同舍曰合、同宿曰聚、亦謂之會、一曰光芒相逮曰會、未當去而去曰出、未當來而來曰入、一曰

行而造其中曰入、入宿而緩曰舍、一曰所居曰舍、入此宿曰宿、一曰畱二十日以上曰宿、處其所曰居、一曰依度至而不去曰居、不東不西曰畱、依其旁而居曰守、一曰居之不去曰守、一曰徘徊不去其度曰守、一曰居其宿曰守、行而侵之曰犯、一曰經過其星光芒及之曰犯、一曰七寸以內光芒相及曰犯、又曰自下往觸之曰犯、又曰相去五寸而光芒不接者輕、若相去雖一尺以內而光芒相射亦以犯占、先犯而後畱之曰犯、守未當入度而經

犯之曰侵東西正當曰中自上而下壓之曰乘自下而直往上一曰凌一曰相冒過曰凌又曰突掩爲凌相冲而指曰觸一曰兩動直前相抵曰觸一曰行而直前冲之曰觸相凌曰闕一曰合而復離曰闕一曰相擊曰闕東入西出曰貫相逼切曰磨周之一匝曰環環之曰周曰繞迫而侵之曰薄又曰相值相逼曰薄勾者左去右回右去左回如勾字之狀已者往而復還如已字之形一曰去而復回爲勾繞之而去爲已一曰東西爲勾南北爲已一

曰形如勾曰勾如巳曰巳刺者過其旁而光刺射之也掩者當其所而滅其光也食者侵其邊而漸及其中如蠶食葉之狀一曰星月相凌不見者則所食也吞者從上直下掩之也戴者頂之於上也星食月者星襲月中月食星者月至星沒也同光者二體相合不辨其孰爲彼而孰爲此也經天者出於地火土陽星不忌金水陰星經天則晝見者白日出見與日爭光者也李淳風曰聚者自三星以上爲聚聚者積會之象福聚則

吉刑聚則凶先至則吉後至則凶從者經歷次第相及於一也次第從就之象離者雖同宿共度而南北垂隔不和之象也徙者雖同在宿分不相倚待起行移去相避之象也舍者經其宿而行遲也宿者經其宿而過徑去不遲也侵者越理而進以大迫小自上適下漸至損害也凌者以小迫大直往凌之也抵者一動一靜而直至其所也歷者以次相及而過也經者由其中過而無所犯也貫者直經其中過也兵出入之象角者長大於芒與兵

誅伐之象也大者大於本體興建開拓之象小者小於本體亾滅衰敗之象逆者違逆之象和者和順之象遲者徐緩之象疾者急迫之象舍者二星相遇同處一宿之中和則吉逆而刑凶一逆一順一遲一速相會於一宿之中爲會德會則福興刑會則禍作畱者久居其宿作興勃亂之象中者中傷之象掩食主并吞滅亾之象乘凌主協迫暴橫之象戴者主有所立也自上墜下曰隕兵亂旱饑自下而上曰升君以火憂橫飛而去曰矢兵災益

甚兩星從行曰同舍、奸邪謀逆大而去速曰奔、灾禍急速、相去七寸以裏曰合、五寸以裏曰犯、奸謀作逆、兩星相抵曰凌、君危民灾、兩星相觸曰鬪、兵起血戰、從行相及、區而復圓曰襲、陰謀暗害、當去復止曰守、禍大灾深、當去復還曰留、禍亂不息、當去反行曰逆、禍難最凶、周匝不離曰環繞、禍害連綿東西相繞曰勾、南北相勾曰巳、狀如乙巳字樣、乙巳周蔽、其星不見曰掩、如太陽掩星之類、竝主奸邪叛逆、

一曰星晝見若星與日竝出名曰嫁女星與日爭光武且弱文且強女子爲王在邑爲喪在野爲兵二曰恒星不見恒星者在位人君之類不見者象諸侯之背畔不佐王者奉順法度無君之象也三曰星闕星闕天下大亂四曰星搖星搖人衆將勞五曰星隕大星隕下陽失其位災害之萌也又曰衆星墜人失其所也又曰當其下有戰場天下亂期三年又曰奔星之所墜其下有兵又曰星隕如雨天子微諸侯力政國有兵凶則星墜爲鳥獸天

下將亾則星墜爲飛蟲天下大兵則星墜爲金鐵天下大水則星墜爲土國主亾有兵則星墜爲草木兵起國亂亾則星墜爲沙星墜爲人而言者華惡如其言又曰國有大喪則星墜爲龍

凡五星守犯列宿皆爲凶咎若逆行或環繞勾已之其禍尤大

凡五星有變則其精散爲妖星

凡五星見伏畱行逆順遲速應歷度者爲得其行政合於常違歷錯度而失路盈縮者爲亂行亂行

則爲天矢彗孛而有亾國革政兵饑喪亂之禍云
五星爲五德之主其行或入黃道裏或出黃道表
猶月行出入有陰陽也終出入五常不可以筭數
求也其東行曰順西行曰逆逆則遲通而率之終
爲東行矣不東不西曰留與日相近而不見曰伏
伏與日同度曰合其留行逆順掩合犯陵變色芒
角凡其所主皆以時政五常五官五事之得失而
見其變

木火土三星行遲夜半經天其初皆與日合度而

後順行漸遲，追日不及，晨見東方，行去日稍遠，朝
近中則留，留經旦過中則逆行，逆行至夕時近中
則又留，留而又順，先遲漸速，以至於夕伏西方，乃
更與日合，金水二星行速而不經天，自始與日合
之後，行速而先日夕見西方，去日前稍遠，夕時欲
近南方，則漸遲，遲極則留，留而近日則逆行而合
日，在於日後，晨見東方，逆極則留，留而後遲，遲極
去日稍遠，旦時欲近南方，則速行以追日，晨伏於
東方，復與日合，此五星合見遲速逆順留行之大

經也。昏旦者陰陽之大分也。南方者太陽之位。天地之大經也。七曜行至陽位。當天之經。則虧昃。雷逆而不居焉。此天之常道也。三星經天。二星不經天。三天兩地之道也。

凡五星所出所行所直之辰。其國爲得位。得位者。歲星以德。熒惑以禮。填星有福。太白兵強。辰星陰陽和。所行所直之辰順其色而有角者勝。其色害者敗。居實有德也。居虛無德也。色勝位。行勝色。行得盡勝之。

古歷五星之推，亡逆行者，至甘氏石氏經，以熒
太白爲有逆行，夫歷者，正行也。古人有言曰：天下
太平，五星循度，亡有逆行，日不食朔，月不食望，熒
惑主內亂，太白主兵，月主刑，內臣不治，四夷不服，
兵革不寢，刑罰不錯，故二星與月爲之失度，三變
常見，及有亂臣賊子，伏尸流血之兵，大變乃出，甘
石氏見其常，然因以爲紀，皆非正行也。

凡五星爲政，歲緩則不行，急則過分，逆則占，熒惑
緩則不入，急則不出，違道則占，填緩則不還，急則

過舍逆則占太白緩則不出急則不入逆則占辰緩則不出急則不入非時則占五星不失行則年穀豐昌

凡五星同色天下偃兵百姓安寧歌舞以行不見災疾五穀蕃昌

凡五星盈縮失位其精降於地爲人歲星降爲貴臣熒惑降爲童兒歌謠嬉戲填星降爲老人婦女太白降爲壯夫處於林麓辰星降爲婦人吉凶之應隨其象吉

營室爲清廟、歲星廟也、心爲明堂、熒惑廟也、南斗爲文太室、填星廟也、亢爲䟽廟、太白廟也、七星爲員宮、辰星廟也、五星行至其廟、謹候其命、

五星分天之中、積於東方、中國大利、積於西方、夷狄用兵者利、

凡五星所聚宿、其國王天下、從歲以義、從熒惑以禮、從填以重、從太白以兵、從辰以法、以法者、各以其事、以法致天下也、三星若合、是謂驚立絕行、其國外、內有兵與喪、民人乏饑、改立侯王、四星若合、

是謂大盤其國兵喪竝起君子憂小人流五星若合是謂易行有德受慶改立王者奄有四方子孫蕃昌亾德受罰離其國家滅其宗廟百姓離去被滿四方五星皆大其事亦大皆小其事亦小

凡五星早出爲贏贏爲客晚出爲縮縮爲主人五星贏縮必有天應見杓

太白猶軍也而熒惑憂也故熒惑從太白軍憂離之軍却出太白之陰有分軍出其陽有偏將之戰當其行太白還之破軍殺將辰星殺伐之氣戰鬪

之象、辰星出東方、太白出西方、若辰星出西方、
白出東方、爲格野、雖有兵不戰、辰星環繞太白、若
鬪大戰客勝、主人更死、視其所指、以名破軍、
凡有軍謹候太白辰星出、太白出辰星不出、太白
爲客、辰星出太白爲主人、出而與太白不相從野、
雖有軍不戰、辰星出太白不出辰星爲客、太白出
辰星爲主人、一出一不出、爲主客不備、野有軍不
戰、其出也、一東而一西、不戰、若俱出一方而異宿、
軍雖相近不戰、必合宿乃戰、相凌乃有大戰、

太白辰星俱出東方、不相近、二十日、三十日辰星入東方、南國有兵不戰、至春夏兵起、

辰星太白俱出西方、不相近、二十日至三十日辰星不入西方、北國有兵、

太白辰星同出東方、皆赤而角、瀕海之國大敗、太白辰星同出西方、皆赤而角、中國大敗、

辰星隨太白出東方、天下無兵、兵起、期六十日、太白出辰星北、客勝、辰星出太白北、主人勝、

辰星太白俱出東方、色黑、外國利、中國不利、

辰星隨太白出西方、天下有兵、不戰亦不解、辰星居其前、兵罷若抵太白環繞之、居西北陰國兵起、居西南陽國兵起、期半年、兵在外必戰、利客不利主人、

太白隨辰星出西方、無兵兵起、期六月、有兵客利、相近去可四尺、客益利、不戰則兵未解、辰星入則兵罷、

太白出東方、辰星居其前、不去、至十五日若二十日而入陰國、兵滅不戰、

辰星出西方居太白前不去十五日若二十日而入陽國兵滅去則兵罷

太白出東方若西方辰星居其後二十日兵起辰星居其前十五日兵罷辰星歷太白左小戰歷太白右數萬人戰主人吏死辰星過太白右三尺軍急約戰出太白北小戰主人勝出太白南大戰辰星過太白其間可容劍小戰客勝居太白前三日軍罷出太白左小戰出其右大戰辰星來抵太白不去將死正其上出客勝下出客

太白辰星相遇、太白避之、客強、主人畏死、太白出辰星右而居其前、主人利、逐入、主人大利、辰星迫太白、主人強、客畏、主人辰星出太白右而居其前、客利、逐去、入之、主人不利、客大利、辰星入太白中五日乃出、及入而上出、破軍殺將、客勝、下出、客敗、

太白與辰星合、太白居右、辰星居左、主人勝、辰星居右、太白居左、客勝、

天下無兵、辰星在東方、若西方居太白前、水中兵

有滅者

太白辰星俱出西方辰星居太白前相近間可容劍在西北陰國有兵謀以戰主人勝在西南陽國有兵謀以戰

太白辰星合在西南南國之事在西北北國之事正南爲中國

凡五星至二星相合聚間火失光爲兵喪爲旱木失光人主惡之土失光女主惡之金失光兵起亦爲喪水失光爲大水以日占之

五星相聚逆行者其事逆臣奪主國

五星聚而閔天下大戰寇賊並起民庶流離夷狄內主

五星聚惟土星有芒角者所舍之國大凶

凡五星歲與填合則爲內亂與辰合則爲變謀而更事與熒惑合則爲饑爲旱與太白合則爲白衣之會爲水

太白在南歲在北名曰牝牡年穀大熟太白在北歲在南年或有或亡

熒惑與太白合，則爲喪，不可舉事。用兵與填合，則爲憂。主孽與辰合，則爲北軍用兵，舉事大敗。填與辰合，則將有覆軍喪師。與太白合，爲疾，爲內兵。

辰與太白合，則爲變謀，爲兵憂。

火與水合爲淬，與金合爲鑠，不可舉事。用兵。

土與金合，國凶。地與木合，則國饑。與水合，爲雍沮，不可舉事。用兵有覆軍。

木、火、土合在一舍，爲旱饑。有土功，一日，國分。相去

三尺以內守七日以上天下兵起五穀大傷人
食七寸以內名曰芒交臣弑其君期八十日

火土水合女子爲天下害大臣逆

木金土合其國兵起不戰

木土金參會同舍相去三尺兵起大戰相去七寸
以內曰芒交外內構謀弑其君

火土金合天下有大謀

木火金合殺大將天下皆有兵三王鼎足其分國
凶

金水土合其國將戰不勝，凶地。

木火二星合爲更政革命，其分有兵君憂人愁，歲星熒惑陽也，太白辰星陰也，陽主中邦，陰主外邦，陰與陽合，中外連兵，陽與陽合，兵謀在中國，陰與陰合，兵謀在外國，又曰相近曰犯，其殃大，相遠曰合，其殃小。

木與火合爲饑爲旱，一曰大臣匿謀有反者，主凶，地國有水，一曰爲內亂，臣謀主戰，北軍困。

木火合相去七寸以下，光芒相及，臣害君，一曰火

木同舍相去三尺以內相守七日以上其國有反
臣五穀傷民不安期其年二尺以內相守七日至
二十日兵起國滅內戚相殘期一百八十日

木火合而相守其國君憂守十日以上穀貴人作
亂火在木北有軍大戰火在木南偏將戰客軍憂
木火合於一舍火在木上名曰子母同光其國大
強留之百日不變色失次其國且以重德致天下
木火合於宿之陽母子同鄉其國安合於宿之陰
兵起

木火同行疾兵從之戰不勝

熒惑當出見而近歲星出其北天下有急兵出其南有匿謀在其中

木火接芒與東方宰相亂人主計不定不出三年大兵起

木火接芒與西方國有憂明年春失農時

木火合色俱青爲疾赤爲兵黃旱白喪黑饑芒角接人死殆盡

木火再合有走王再合者東行已合西行又合也

木土合爲內亂爲饑爲變謀更事人主失勢

木土合其分戰不勝亡地主死

木土合井泉高而平原出雲歲不登有大水又曰天下易主民流千里魚鱉陸死民苦盜賊其分國不可戰戰必敗

木土合相守十日則天降禍不義者受其殃

木與土合一舍木在下土在上名曰雌雄間客軍大敗主人勝六十日不下有空國徙王

木土同舍相去三尺以內相守二十日以土國更

主天下大爭、大臣相仇、天子易統、天下存亡者半
木土合、有兵相守、土在木下、利客、土在木上、利爲
主人、

木土同出、其宿國亡地、同入、其宿國得地、

木土皆出東方、夕入西方、百九十日皆正中者、兵
發東方之國勝、當入不入、反東行、九十日正中者、
當發兵、主死民流亡、

木金合爲水、爲饑、爲疫、光芒相接、有兵、兵戰、殺大
將、無兵、亂起、或曰、有軍、則先起者勝、金在木南、以

兵饑金在水北以水饑皆有亾國

木金同光大戰殺將不同光兵起不戰

金木同在一舍其年有蝗蟲生

木金同舍相去一尺天下有兵不出四十日必戰
星色青東方勝色赤南方勝色黃中央勝色白西
方勝色黑北方勝

木金合相去五尺有兵戰三尺有破軍二尺有拔
城一尺治兵光芒相接大戰無兵在外則兵大起
木金合相去三尺相守七日以上將軍誅死

木金合三尺內七寸以外木出金左有爭出金右
年饑

金在南木在北名曰牝牡相承年穀大熟金在北
木在南歲困有凶國

木金合於東方木在北金在南陰陽合爲年豐木
金合於西方木在金位名曰伐其國凶

金木俱出東方若併入西方王者凶地

木金相遇有兵兵無兵兵起乍東乍西有逐相
太白出歲星北客勝歲星出太白北主人勝

歲星隨太白出於西方光怒必戰破軍殺將若
繞之有死王無兵在外則兵起相走

金木一東一西害侯王一南一北兵自伏

金木合金從本疾主人急木從金疾客急

木木合爲變謀更事其國多水民饑

水木合爲內亂有軍在外不利先起者若相守七

日至四十日人流亡芒相及則外與內謀其君

木水合一曰將死光芒相接天下水泉湧出

火土合國憂主走爲內亂爲兵一曰大旱一曰女

子爲天下害。一曰主憂兵起。又曰其下失地有破國。一曰其國不可舉事用兵。又曰火土所合宿國饑戰不勝。

火土合火去而復來環繞之不出六年國亡。

火土合土在火上名曰逆其國防外兵土在火下各不動名子母同光其國得地益強若同上下民有逆心兵起更王。一曰土在火上光芒相接女主憂。

火土合火入土光中將相憂。

火金合金在火上所在之國且以義致天下一日
金居火上其國用兵三十日不去天下三年起兵
六十日不去其下有空國

金先居火上而復出火下其國有反臣

金在火左右其國必大敗

火在金前後左右成戰客勝

金在火東無兵起不出三月

火金合火入金光芒中火在南大旱戰則小將死
火在北爲水

火與金合金從火有兵兵罷火從金兵大起火從金而金無光火赤而光所入宿受兵國亡

火隨金行七日以上追及金相去尺以下大臣死其分旱其國受兵戰敗亡地一日金火相隨而行所入宿國君死人饑流亡道上多死人有亡國火金合而金起芒角居火上其國用兵戰勝

火入金出其陰不有分軍必有他急

火與水合有軍在外不利先起者一日火水合大旱赤地千里國主走秋合有兵冬合有喪

火水合於東方臣謀主一曰水火合於東方水色白而大兵在外割地爲和從前國大病從旁小病火與水合在他時爲淬在冬爲刑

水火同行若不有兵疾疫流行火經水名曰自伐不可用兵必有大敗覆其國家以及其君凶

土與金合爲喪爲內兵國亾地相守數十日不去后有內亂

土在金南一尺女主用事在金北一尺女主死若行去宿遠君不立后

金土合金在土南年穀大熟金在土北歲荒蕪
土金同宿金在土上不出二月有兵民流
土金合爲水土在金北去之七寸母子同光其歲
大豐

金土合土色青多死喪赤爲兵黃爲旱
土水合爲變謀更事又爲旱爲陰謀有兵爲將戰
其分將軍死敗無兵爲內亂

金水合爲兵憂爲變謀爲邊兵戰

金水同出東方東方有兵同出西方西方有兵

金水並出東方利舉兵西伐東軍勝金水並出
方利舉兵東伐西軍勝金水俱出東方或俱出西
方客主相見有兵必戰無兵兵起

凡歲癸惑太白填四星與辰鬪皆爲戰兵不在外
皆爲內亂

木與金鬪有大兵一曰國有內亂野有破軍又曰
無兵兵起有兵兵戰又曰其國旱饑不可舉兵又
曰夷狄內侵有易相又曰人流徙有亡國一曰兵
在外爲亂戰敗一曰相爲亂有滅諸侯民多死亡

有土功

木金鬪於東方、有兵在外必戰、鬪於西方、有亡國死王、又曰、其年八月、兵起流血、

木火合鬪、殺大將、

木與土鬪、不出其年、王者亡地、將軍死之、一曰、其國先起兵者、敗、一曰、天下哭泣相望、期六十日、又曰、有易相、又曰、星色青爲喪、赤爲旱、白爲兵、黑爲水、黃爲土功、

木與水鬪、有兵在外則戰、無兵爲內亂、將死、一曰、

有亡國不出三年

木與金鬪其野有破軍殺將一曰有戰兵不在外而在內大戰將死歲大饑

金木水鬪有大兵

金火春鬪其歲旱夏鬪內主易秋鬪兵大起冬鬪女喪王者憂將軍死

火與水鬪國以暴敗一曰女爲天下害又曰火水鬪於東方臣伐主鬪於西方宮中有亂一曰火水鬪將死其野有大水

火與土鬪其國子弟爲亂一曰不出其年有亾國
一曰有叛臣作亂兵起一曰王者亡地將軍死之
一曰其下國有圍邑

木與金鬪期九十日憂王者亡地一曰有兵喪更
立侯王一曰臣謀主兵起

土與金鬪東方臣伐君鬪西方強國宮中有亂一
曰女主爲亂皆期九十日

金與水鬪其國內亂兵起軍在外者破大將死一
曰先起兵者凶若環繞之大將戰一曰不出其年

有改王，一曰有反臣，一曰金水閼，其分國大旱，
一曰有大戰，無兵在外，則兵起，一曰金水相遇而閼，
辰星不勝，燕趙代有憂，太白不勝，秦有憂，不勝者，
其光分散，或歛芒失色，皆爲不勝。

土與木閼，軍在外則戰，有死將，無軍爲亂，兵起，一
曰水土閼，關梁不通。

歲星犯熒惑，爲旱，爲饑，有兵大戰，
歲星觸熒惑，其國亂。

歲星食熒惑，不出三年國亡。

歲星守填星大臣相滅天下交爭一曰有兵戰主
人吏死其國大穰一曰水土交行必有破傷

歲星與填星守其地有王者興除舊布新

歲星犯太白有兵大戰一曰相死大臣黜女主喪
一曰其分草再生將軍誅無將軍則不出四十日
有拜將

歲星乘太白有戰偏將死

歲星觸太白四夷來侵

歲星守太白蠻夷叛四序不順陰陽爽和

歲星犯辰星有兵太子憂一曰民多病洩

歲星掩辰星有兵戰客將死滅之殺大將貫之
之殺偏將觸之主人病

歲星守辰星主憂有賊水退國不安水退賊敗
熒惑犯歲星冊太子有赦一曰有兵戰一曰大臣
有匿謀一曰蟄蟲冬出雷早行禾不成一曰有戰
火在木北天下急出其南有謀在中一曰奸臣爲
謀殺大將

熒惑守歲星太子憂一曰大赦守後火入三度其

國大敗退三度賊敗火貫木殺小將

熒惑犯填星兵起大戰一曰女主當之或曰火犯土土在下火在上其國吉上在上火在下大臣憂一曰火犯土爲旱

熒惑觸填星有兵主病火入土將軍爲亂

熒惑守填星旱兵起一曰殺太子有內賊王者亡城守後火入三度國不安退三度則無咎

熒惑犯太白主亾天下憂兵起大戰金在南南國敗在北北國敗

熒惑乘太白、兵雖起不用、其國且以武致天下

熒惑觸太白、有暴賊、

熒惑經太白、軍憂、難之、軍却、

熒惑從太白、下上抵之、不入、軍急不戰、

熒惑出太白陰、有分軍、出其陽、有偏將戰、主人軍敗、若環繞太白、偏將死、

熒惑入太白中、上出、破軍殺將、客勝、出太白左右、軍勝、

熒惑入太白、將戮、入久不出、國亂主憂、

熒惑環太白成勾已大將死

熒惑抵太白不入亦不出客將死

熒惑摩太白而過有數萬人戰有破軍主人將死

熒惑薄太白主人不利亡偏將

熒惑襲太白兵起相易一日軍亡

熒惑犯太白主不安守其北太子憂守其南庶子

憂守後入三度國大敗退三度灾消一日火金相

守流血滿野

熒惑犯辰星其國不可舉事用兵一日野有兵不

戰一曰兵在外者敗

熒惑觸辰星有異姓者王

熒惑守辰星太子憂有赦守後入三度大兵聚其
下退之水災

填星犯歲星內亂一曰其野有兵相攻

填星守歲星有兵守後木退歲歉土退年豐有賊
填星犯熒惑大人忌之有二星皆色赤或俱無光
或土在火芒內火在土芒內皆爲其國大人死旱
潦災物不成

填星犯太白爲兵，一曰大水草木死。

填星犯辰星爲旱爲變謀更事，一曰將有危，一曰上犯水冬雷虹出來年夏寒隕霜雨雹。

太白犯歲星王者有賊，一曰爲饑期三年，一曰兵起爲旱，一曰草木再生再死，一曰金出木北客利，木出金北主人利。

太白犯歲星環繞之若并光有兵戰敗軍殺將，一曰太白環繞歲星有亡王。

太白襲歲星君敗死。

太白犯熒惑主病有兵大戰客敗太白在南南
敗在北北國敗東西亦如之

太白乘熒惑客軍敗隨之軍憂

太白觸熒惑內有賊臣

太白守熒惑太子憂其間客指血流滿野若火退
殺太子金退賊動

太白貫熒惑主人亡偏將死

熒惑方行太白環之有破軍殺將

太白犯填星太子不安國有咎一日五穀不熟國

饑人流、

太白觸填星主憂、一曰、人主放恣、大臣相殘、賊兵起、

太白守填星、太白在鎮北、天子失地、守後太白退、臣憂填退主憂有賊、

太白犯辰星、國不安、兵起、一曰、金水相犯、西方有人、東方大虛殃及匹夫、

太白觸辰星、殺宰相、

太白守辰星、國憂、辰星先退、有異姓者王、

太白來守辰星旬日不去客將死

辰星犯歲星其國外野不安

辰星守歲星天非時降霜

辰星犯熒惑上妨太子下妨太尉司馬

辰星觸熒惑太子不安若離而復合大水漂山人

主哭於宮

辰星守熒惑天下多死喪疾疫兵起

辰星犯填星夏寒妨女主一日春多雨水

辰星守填星夏霜雹春多雨

辰星守太白，爲變謀，爲兵憂，守之旬日不去，主人兵不利，將死。

辰星犯太白，兵起，大戰，破軍殺將，辰星在上，客勝，在下，主人勝。

武備志卷一百五十八

占度載

占十一

占星五

星

歲星一曰攝提，又曰重華，曰應星，曰經星，曰紀星，
東方青帝靈威仰之使，蒼龍之神，木德之精，歲行
一次，十二年一周，天與太歲相應，故謂之歲星，歲

星主道德在五常爲仁五事爲貌仁虧貌失逆春
令傷木氣則罰見歲星歲星主春其日甲乙其辰
寅卯其卦震巽其音角其數八其帝太皞其神勾
芒歲星所在其國有福逆之則怒爲殃尤甚歲星
主司天下諸侯人君之過主齊吳以東之國又爲
農官主五穀所居之宿五穀蕃昌其對爲衝乃有
殃歲星所在之國不可伐可以伐人所留之野吉
所去之野凶超舍而前爲贏退舍爲縮贏其國有
兵不復縮其國有憂其將死國傾敗所去失地所

之得地一曰當居不居國亡所居國昌已居之而
又東西去之國凶不可舉事用兵安靜中度吉出
入不當其次必有天伏見其舍也歲星羸縮以其
舍命國其所居久其國有德厚五穀豐昌不可伐
羸縮失次其國有變不可舉事用兵又曰人主之
象也色欲明光潤澤德合同又曰進退如度奸邪
息變色亂行主無福赤而角其國昌赤黃而沉其
野大穰

元史云歲星八十三年而七周天與日合度者七

十有六凡三百九十八日八十八刻而與日合

石氏云歲星羸而東南見彗星羸東北見覺星縮西南見橈雲如牛縮西北見槍雲如馬槍橈梲彗異狀其殃一也至日行一尺出二十餘日乃入其國凶不可舉事用兵出而易所當之國是受其殃又曰妖星不出三年其下有兵及失地若國喪

君喪

甘氏云歲星羸東南不出三月廼生彗本類星末類彗長二丈羸而東北不出三月廼生天梲本類星末銳長四尺縮而西南不出三月廼生天槍左

右銳長數丈，縮而西北，不出三月，廼生天棧。本經星末銳長數丈，必有破國危君，伏死其事，餘殃不盡爲旱凶，饑暴疾至，不出五年，其下有軍及覆地。若國君喪，又云金水二星附日而行，出入有常，出早爲月食，出晚爲天祲及彗星。

歲星在春王，色比左角大而青精光，立春後滿七十二日後十八日，色黃，仲春之時，有芒角，在冬相，其色精光而無芒角，在夏休，其色青黃無精光。

在四季囚其色青微黑

在秋死其色細小不明此其常也如其常則天下
和平

歲星當王時而有相休囚死色其進舍也有德令
其退舍也有惡令其留守之舍有逆法有逐臣
當其時而有王休囚死色者其留守之舍國凶其
進舍也有兵其退舍也相有逆謀不成

當休時而有王相囚死色當囚時而有王相休死
色者其留守之舍國有禍喪其進舍也有兵其

舍也將軍亡

當死時而有囚色大赦

歲星色赤爲兵一曰歲星色白多爲兵色青白而不光潤兵獄並起

歲星青白如灰主有憂期五月兵獄並起

歲星變色而赤芒角其國大旱歲饑有兵

歲星在東方宿中色宜青而白角爲兵

在南方宿中色宜赤而青爲憂白角而怒有兵
在西方宿中色宜白而青有憂赤黑皆爲兵

在北方宿中色宜黑而青有憂赤爲兵白角而怒亦爲有兵起

歲星變赤若有芒角爲誅殺爲兵

歲星乍大乍小其國凶乍明乍暗國憂土辱

歲星忽不見國亡

歲星出如浮而沉其國有土功如沉而浮其野亡浮者見之沉者伏之

歲星芒角動搖其國凶芒角而怒所居興起五穀不登

歲星有芒角赤黃人主以武強若戰歲星無芒角不勝

歲星芒角指者敗迎角而戰者亦敗

歲星五角芒天子自出將兵

歲星一角外射天子大使出三角兵出有所誅

歲星七角且芒天子與四方戰期不出一年

歲星九角且芒天子殺賢臣誅邊將期一年

歲星角且芒皆爲天子征伐四方

歲星王時當有芒角無芒角則主威權在下

歲星超一舍二舍，至於三舍，侯王不寧，不則地動，退一舍二舍，至於三舍，王者滅亡。

歲星順行列宿者，喜也；逆行有所陵犯，皆爲凶災。歲星逆行，其國不可興兵；順則兵宜進，逆則兵宜退。

歲星逆行，當遲而疾，失一次，以至二三次，人主驚走，社稷危亡，天下兵起，民去如鄉，死者如山。

歲星晝見，爲臣強；其地有兵，晝見與日爭光，武弱文強，大臣謀逆。

歲星流國主亡

歲星順行不可逆戰，逆行不可向之而戰。

歲星舍守列宿，其色白爲敗常，以春甲乙日候之，變色則爲災。

熒惑一曰赤星，又曰罰星，曰執法，曰天候，南方赤帝，赤熒怒之使，朱雀之神，火之精也，其行無常，出則兵起，入則兵散，熒惑居東方爲懸息，西方爲天理，南方爲熒惑，或進退無恒，躁急促疾，故曰熒惑，其在五常爲禮，五事爲視，禮虧視失，逆夏令，傷火。

氣則罰見熒惑熒惑主夏其日丙丁其辰巳午其卦離其音徵其數七其帝炎帝其神祝融熒惑死喪主司天下羣臣之過惡驕奢亡亂妖孽主歲成敗察過失以譴告人主者也主楚吳越以南諸國主憂患愆尤禍福之所由生其國有道則疾行而東無道則留而降罰爲賊爲疾爲喪爲饑爲兵所居之國受殃環繞勾已芒角動搖變色乍前乍後乍左乍右其殃彌甚周旋止息則爲死喪寇亂其野亡地熒惑失行而速兵聚其下順之戰勝又

曰熒惑不動、兵不戰、有誅戮。又曰、熒惑爲天子之理、內則理政、外則理兵。又曰、熒惑逆行一舍二舍、爲不祥、居之三月、國有殃。五月、受兵。七月、國半亾。地九月、地大半亾。因與俱入、國絕祀。居之殃、還至。雖大當小、久而至當小、反大。若芒角動搖、環繞之、及乍前乍後、左右殃、益大。與他星鬪光、相逮爲害、不相逮不爲害。其行東南西北疾也、用戰順之勝、逆之敗。

元史云、熒惑七十九年而四十二周天、與日合度。

者三十七，凡七百七十九日九十二刻，又百分刻之九十分而與日一合。

熒惑在夏曰王，色比心大星而大，赤精光，仲夏有芒角。

在春曰相，其色精光，無芒角。

在季夏曰休，其色赤黃，無精光。

在秋曰囚，其色青白，不明。

在冬曰死，其色黃黑細而不明，此其常也。色如其常，則天下和平。

當王時而有相休囚死色其留守之舍不可舉事
用兵其進舍也其國不祥其退舍也其國有旱
當相時而有王休囚死色其留守之舍其國起兵
其進舍也有蝗其退舍也赤地千里

當休時而有相色其邦亂臣不從令有王色其國
受殃有囚色有小兵有死色盜賊橫行廟堂有火
其留守之舍受殃

當囚時而有王色大臣憂有相色臣下毀傷有休
色使者道路有死色丁壯從軍其進舍也有兵其

退舍也有妖言其留守之舍道路不通

當死時而有王色宗廟不享有相色大臣攝政有
休色宗廟火災有囚色丁壯多死於兵其畱守之
舍其下有兵其進舍也多風其退舍也流水湯湯
災惑變色而黑有大水暴兵至

災惑色赤黃發疾黑青發難黃若赤一歲內發白
色期二年青色期三年黑色期四年至五年以星
行尺寸深淺爲期應

災惑色蒼細小而無精明名曰進賊讒臣入國不

有亡君必爲亂國

熒惑無光先起兵者敗

熒惑赤芒南方國利青芒東方國利黑芒北方國利黃色中國利色黑而芒所居之野有殃

熒惑色大赤而芒不出三年兵喪並起色青角其國有兵憂

熒惑色青有大兵旱色變正赤其秋有兵

熒惑色赤而芒兵在外大戰無兵兵起

熒惑赤大燁然而芒其地有兵大而赤角有兵出

攻戰客利、

熒惑有芒角、以戰皆不利、隨其所指而擊、破軍殺將、

熒惑出色赤怒逆行成勾已、戰凶有圍軍、勾已有芒角如鋒刃、人主出宮下殿、

熒惑始出大而益小者、其國不利、

熒惑晝見、臣謀主所在分兵起、大旱水竭、

兩軍相當有雲獨掩熒惑、有伏軍死將、

熒惑出東方反行而西、有小星擊之即去、其所宿

之國受兵

熒惑疾行而東、命曰狡、狡者止、其相死、疾行而西、命曰滑、滑者起、其將死、疾行而南、命曰讒、讒人興、疾行而北、命曰賊、賊乃作、

熒惑從北入南曰持、不出三年、其國有喪、兵起南方、持、謂持水入火、

熒惑從南失行而北、有兵兵罷、天下旱、是謂以火入水、

熒惑出列宿之南爲孽、出列宿之北復入爲羸、逆

爲縮如是者其下必有伏尸積骨

熒惑春夏失道南行疾爲旱兵在陽國秋冬失道北行疾爲火入水必有破軍殺將

熒惑所在之國不至秋起兵若留守之必有禍殃熒惑所止三月以上國憂一曰大將死五月破軍亡地七月其下地半亡居九月地全亡

熒惑已去而復還守之其殃尤甚從陰之陽亡地三百里從陽之陰亡地二百里從前之後亡地二百里從後之前亡地三百里

熒惑以庚辛曰留天下有大兵

熒惑出東方若西方遲留者其國不利留一月以上爲饑爲兵

熒惑變色失行所留者亡所抵者兵往來疾期九十日遲者期不過三年

熒惑行二十八宿正乘其宿星有軍在外留之三日戰敗大將死

熒惑舍守列宿其色黑爲敗常以夏丙丁日候之色變則爲災

填星一曰地候、中央含樞紐之使、勾陳之神、土之精也、填星常晨出東方、夕伏西方、其行二十八宿而一周天、歲填一宿、故曰填星、在五常爲信、五事爲思、仁義禮智以信爲本、貌言視聽以思爲主、故四星皆失、填星乃爲之動、其羸侯王不寧、縮有軍不復、填星主四季、其日戊巳、其辰丑未辰戌、其卦艮坤、其音宮、其數五、其帝黃帝、其神后土、女主之象、所在國有福、不可伐、主聚衆、主土功、主正紀綱、主周梁、主大常、主司天下、女主之過、填星正、則女

主正邪則女主邪一曰填星天子之星也天子失信則填星大動又曰填星所居國吉未當居而居之若已去而復還居之國得土不乃得女子當居不居既已居之又東西去之國失土不乃失女子不有土事若女之憂居宿久國福厚易福薄當居不居爲失填其下國可伐衝者不可伐既已居之又東西去之其國凶不可舉事用兵失次而上一舍三舍有王命不成不乃大水失次而下二舍有后戚其歲不復不乃天裂若地動

元史云填星五十九年而二周天與日合度者五十七凡三百七十八日九刻又百分刻之一十六分而與日一合

填星在四季之時曰王其色正黃比北極中央大星而精明有芒角

在夏曰相其色黃大而精明無芒角

在秋曰休其色黃白無精明

在冬曰囚其色黃黑不明

在春曰死其色青白細小而不明此其

常則天下利乎

當王時而有相休囚死色其留守之舍有厚德其進舍也其國得土其退舍也失土

當相時而有王休囚死色其留守之舍其國女主微其進舍退舍皆爲土功憂事

當休時而有王相囚死色其留守之舍國人流亡進舍退舍皆有殃

當囚時而有王相休死色其留守之舍及進舍其國嗣子憂退舍有喪

當死時而有王相休囚色其留守之舍國有凶殃其進舍也地動若有蛇怪其退舍也人多流亡
填星色赤而潤澤不出其年兵起

填星赤而芒角有兵喪凡填星色赤爲最惡

填星赤而角期九十日兵起赤而芒有兵火

填星色青白不出五月其國兵起又曰青多爲兵白多爲獄青白等兵獄俱起

填星之相也從立夏至夏至其色當赤而小精明無芒角及季夏之時比北極中央大星赤黃而光

明有芒角季秋之時色當比奎大星黃白而光明
有芒季冬之時色當比左角青黃而光明有芒季
春之時色當比參左肩黃白而光明有芒填星在
四方宿中如其方色吉

填星三黃芒而角土功興

填星赤黑芒兵起期三月

填星九芒大水不則天裂若地動

填星三黑芒其國亡

填星七角俱芒女主專政妄殺

填星出角爲旱若失色五角則有兵戰

填星逆行其國凶逆行一舍爲水民去其邑逆行二舍有兵亡地逆行三舍王者死

填星至其宿不居卽去之其國無道可伐

填星行列舍或居其北往來不安其國不可興土功不可舉事用兵

填星出北方宿中其國不利用兵出東方宿中所出之國兵強出南方宿中其下用兵者亡地出西方宿中其國兵起

填星光明盛大其國大昌、微小其國受殃、

填星大如狼星而色黃、天下之兵雖合其國不亡、
填星變色失行於戊巳之日、及辰戌丑未之月、或
寅卯之月、皆爲大凶、

填星晝見、臣謀君、女主憂、上相死、

填星芒角、有土功、聚衆事、

填星出彗、所居國受兵亡地、

填星舍守列宿、色青爲敗常、以四季月戊巳日候
之、變色則爲災、

太白一曰殷星、又曰太正、曰營星、曰明星、曰觀星、
曰太威、曰太皞、曰衆星、曰相星、曰大囂、曰大爽、曰
序星、晨見東方、曰啟明、夕見西方、曰長庚、西方白
帝、白招矩之使、白虎之神、金之精也、大而色白、故
曰太白、在五常爲義、五事爲言、義虧言失、逆秋令、
傷金氣、則罰見太白、太白金上公之號、大將軍之象、
太白進退、以候兵高卑遲速靜躁、見伏、皆象之占、
主刑殺、主秦雍河華蜀漢以西之國、其日庚辛、其
辰申酉、其卦乾兌、其音商、其數九、其帝少昊、其神

蓍收、出以辰戌、入以丑未、其出入也、必以風雨大、白主威、主斷割殺伐、故用兵必占之、

元史云、太白常與日相近、一年一周天、八年而五合於日、退合者亦五、凡五百八十三日九十刻、又百分刻之、二十六分而與日順逆兩合、

太白兵象也、出而高、用兵深吉淺凶、卑淺吉深凶、行疾、用兵疾吉遲凶、行遲、用兵遲吉疾凶、角、敢戰吉、不敢戰凶、擊角所指吉、逆之凶、進退左右、用兵進退左右吉、靜凶、環以靜、用兵靜吉躁凶、出則兵

出入則兵入，象太白吉，反之凶，赤角戰。

日方南，太白居其南，日方北，太白居其北，爲羸，侯王不寧，用兵進吉，退凶。

日方北，太白居其南，日方南，太白居其北，爲縮，侯王有憂，用兵退吉，進凶。

當出不出，當入不入，爲失舍，不有破軍，必有死王亡國。一曰：天下偃兵，野有兵者，所當之國大凶。當出不出，未當入而入，天下偃兵，兵在外。

未當出而出，當入而不入，天下起兵，所至破國。

未當出而出未當入而入天下舉兵所當之國以當期而出其國昌

出東爲東方入爲北方出西爲西方入爲南方所居入其國利易其鄉凶

入七日復出將軍戰死

入十日復出相死之入又復出人君惡之

已出三日而復微入三日乃復盛出是爲興而伏其下國有軍其衆敗將北

已入三日又復微出三日乃復盛入其下國有憂

師雖衆敵食其糧用其兵虜其師

出西方失其行夷狄敗出東方失其行中國敗

太白出蚤爲月食晚爲天矢及彗星將發於亾道之國

太白出而畱桑榆間病其下國上而疾未盡期日過參天病其對國

凡太白所出所直之辰其國爲得位得位者戰勝所直之辰順其色而角者勝其色害者敗太白白比狼赤比心黃比參右肩青比參左肩黑比奎大

星色勝位行勝色行得盡勝之

太白在秋曰王其色比狼精明而有光於仲秋之時有芒角

在四季曰相其色精明而無芒角

在冬曰休其色精明而無光

在春曰囚其色青黃而不明

在夏曰死其色赤黑細小而不明此其常也如其

常則天下和平

當王時而有相色主弱將強權勢從橫天下有兵

有休色臣有謀主者有囚色所任官者囚有死色
大將野死其畱守之舍兵起其進舍也其下兵歸
之其退舍也兵弱不用

當相時而有王色主弱將強有休色將不用命有
囚色將謀不成有死色將死其畱守之舍有兵其
進舍也是謂趣兵其退舍也兵出不行

當休時而有王色其野多賊有相色兵起民亂有
囚色死人從橫有死色軍死於野其畱守之舍有
逐將其進舍也武吏從橫其退舍也文吏弄權

當囚時而有王色其分國有叛將有相色下犯其上
有休色其野多暴兵有死色有妖言言不祥其
留守之舍不可舉事用兵其進舍也歲多霜雹其
退舍也冬暖不藏

當死時而有王色流水湯湯有相色野火煌煌有
休色錢幣不行有囚色國多狼虎其留守之舍野
獸食人其進舍也白刃槍槍其退舍也兵不成行
太白主西雖其體大而色白光明而潤澤所在之
分兵強國昌體小而昧軍敗國亡

太白出東方、色黃而明、出西方、高而色白、此其常也、

太白圓大、怒而色赤、天下有兵、盛而不戰、赤而芒角、乃戰、

太白色猛赤、次白而蒼、悴而不光、是謂失色、其所
在國、雖得地、擊之必克、

太白色黃黑、軍在外者、宜罷之、

太白始出色赤、有兵、主人勝、

太白色蒼白而靜、天下厭兵、

太白色黑而大青芒角陰國大勝戎兵乃來風
數起國多賊盜有大獄大兵

太白色黑秋破師

太白色白而無角以戰不勝

太白色青而暗小國有大憂

太白色赤而怒兵起國多火災

太白色赤者武也利以戰色白者文也不利以戰

太白白圓不可戰白角有喪赤角有兵戰

太白光明見影其國戰勝

太白細小不明、天下盜賊多而不發覺、所居國尤甚、

太白芒炎然而上大兵起、炎然而下、則有天狗下、於其野、有流血、

太白見一芒、兵起不用、見二芒、有戰、見三芒、天下兵起、四芒、諸侯死於境、五芒、天下更制、十芒皆鈞、其國不戰而受地、

太白芒出長而銳大、利攻戰、順芒所指、擊之勝、太白赤而角、將戰勝、無角戰不勝、

太白所在之鄉芒日增長如行過維此威武之氣
也、不可不備、

太白五角有立將、六角有取國、七角成王、四角有
赦、三角而動有反城、胡兵起、

太白過宿角長取地長、角短取地短、角外指得地、
內指失地、期一年、

太白芒角動搖盜賊羣起、兵旱竝作、

太白初出大而後小、其國兵弱、先勝而後亡、初出
小而後大、其國兵強、先敗而後成、

太白出而大甲兵煌煌，旌旗相望。

太白出而小有城，不能守，有兵不能戰。

太白出而赤圓大而光，期不出九十日，兵大起。

太白出而小，後大，在東方，陽國兵起；在西方，陰國

兵起。

太白未當出而出東方，名曰重華，吏虐民擾，不得

耕織。

太白未當下而下東方，名曰少歲，其歲饑，鬼神不

享。

太白未當出而出西方名曰長強有聚卒兵起
太白未當下而下西方名曰白消有喪吏民帶劍
死者不葬

太白不當出而出主躁臣熾軍破國亡

太白出西方順行至四正西方之國吉出東方逆
行至四正東方之國吉四正午也出西則從西至
午止出東則從卯至午止不得過午也過午則爲
經天凶

太白出東方以辰巳爲吉逆行不至巳而返陽國

強陰國戰不勝過巳不及午陽國霸天下及午天下聽命於陽國出西方以申未爲吉順行不至未而返陰國強陽國戰不勝過未不及午陰國霸天下及午天下聽命於陰國

太白昏至未丁間大將憂晨至巳丙間小將死太白出南不得過申北不得過酉失行而北過酉名曰返生不利戾王失行而南過申不利用兵一日太白失行而南不有破軍必有屠城北國當之太白失行而北天下兵大起失行而南一曰有兵

兵罷期三年。

太白出卯南，南國勝；出卯正東，東國勝；出西南，南國勝；出西北，北國勝；出酉正西，西國勝。

太白出巳，殺大將；出未，陽國傷；出戌，胡兵起，不戰。太白出戌入未，是謂犯地刑，絕天維，其國受兵，將多傷。

太白出東方，若西方，過管室，強國興；不及管室而返還入，強國敗。

太白行失道，爲將有奸；止失道，爲大奸；逆行而失

道者尤甚、

太位居實有德也、居虛無德也、

太白出於辰之南、鄭得位、行不失色、黃而赤、大而有角、勝行失而蒼小敗、

出於辰卯之間、宋得位、行不失色、黃而赤、大而有角、勝行失而黑小敗、

出於寅之北、趙得位、行不失色、黃芒而有角、勝行失而蒼小敗、

出於寅卯之間、衛得位、行不失色、黃大而有角、勝

行失而蒼小敗、

出午未之間、吳越得位、行不失色、蒼赤而有角勝、行失而黃小敗、

出於申之南、楚得位、行不失色、赤大而有角勝、行失而黑小敗、

出於申酉之間、秦得位、行不失色、白大而有角勝、行失而赤小敗、

出於戌之北、燕得位、行不失色、黑大而有角勝、行失而黃小敗、

出於酉戌之間，齊得位，行不失色，蒼大而有角，勝行失而白小敗。

太白始出西南維，在日月之陽，陽國之將傷，在其陰，陽國利；出西南維，在日月之陰，陰國之將傷，在其陽，陰國利。

太白出東北維，匈奴有兵相攻。

太白行疾爲武，利以戰，行遲爲文，以戰不利。

太白已入而未出，不可起兵。

太白入東方未出西方，其六十五日爲陽，六十五

日爲陰，以此時用兵，雖勝有殃。

太白入西方，未出東方，其十五日爲陽，十五日爲陰，以此時用兵，戰必敗。一曰：太白入西方，未出東方，南方之國起兵，雖戰勝得地，後必敗亡地。

太白入東方，未出西方，北方之國起兵，雖戰勝得地，後必敗亡地。

太白不見，若有客軍來挑戰，宜應之，不可先擊，待其先動而應之，勝。

太白始出東方，西方之國不可舉兵，始出西方，東

方之國不可舉兵，違之者兵敗國亡。

太白晨出東方，平旦見辰巳間，寇來深入，謹守勿戰，去亦勿追。

太白出東方爲德，舉事用兵左迎之吉，出西方爲刑，舉事用兵右背之吉。一日出軍，宜背刑向德，交戰宜背德向刑。

太白以其時出陽，四十日不動，先起兵者不利。又曰：在陽國利，其以陽時出於陰重利。

太白始出西方，小而圓澤有光，敢戰者吉，不敢戰

者凶、

太白出至其國之日不見其兵弱可擊得其將、

太白不見三日有亡國喪師、

太白入七日而復出將軍戰死、

太白不上下下而留桑榆間病其下國若出一百六十日不能參天主卑令不行民亂多盜若出未滿一百六十日而上過參天主尊令行、政理無盜、一日過參天病其對國參天者三之一也過參天則在酉戌之間也、

太白始出未可擊也，色盛未可擊也，色衰未可擊也，色死急擊勿失，不擊客將爲主人，色死者赤黑也。

太白變色而逆行不可戰。

太白在秋三月出西方，色當白，太白而逆行凶，且有金石之妖，若星隕而爲石，石之所下，寇至其野，當祠蓐收及西海之神以禳之吉。

太白晝見，有兵兵止，無兵兵起，一曰太白，秦星也，晝見秦國兵強。

太白晝見與日爭明四海起兵一曰強國弱小國
強女主昌

太白經天天下革民更主人流亡天子失位刑法
苛而攻戰行則太白經天經天者謂出東方而入
西方西而入東也太白陰星出西則當伏西出東
則當伏東過午則經天經天則天下革命晝見與
經天不同晝見謂當晝而見經天則順行至未或
逆行至巳而不伏故昏旦當午而見所以出東而
入西出西而入東也五星木火土爲陽星不以昏

旦過午爲嫌，金水陰星附日而行，昏旦而見於午，則放恣甚矣。故其殃爲大，凡經天則必晝見，以其去日遠也。晝見則不必經天，故各自爲占也。

太白出而墜地，其下山摧石裂，大水枯竭。

太白流，其國兵敗將死。

太白自暈，天下有赦，有兵不出二十日，其國失軍。

太白出，攘氣三丈，大水兵起。

太白出，攘氣明，大風道上無灰塵，不出三月，穰貴五倍，不出年中，有兵。

太白出氣長三丈、若五六丈、大風雨兵起、所指軍民狙驚、

太白出彗、出西南維、中國受兵亡地、

太白出彗、出西北維、胡狄受兵亡地、

太白舍守列宿、色赤爲敗、常以秋三月庚辛日候之、變色則爲災、

辰星一曰安調、又曰細極、曰能星、曰鈞星、曰司農、曰兔星、曰小武、曰同農、曰鼎星、曰小爽、北方黑帝、叶光紀之使、玄武之神、水之精也、辰星之出、常在

四仲出以辰戌入以丑未二旬而入晨候之東方
夕候之西方附日而行其出入也不違其時故曰
辰星辰星宰相之象又爲廷尉主刑法殺伐將戰
鬪有軍在野爲偏將軍無軍則官主和陰陽在五
常爲智五事爲聽智虧聽失逆冬令傷水氣則罰
見辰星辰星主冬其日壬癸其辰亥子其帝顓頊
其神玄冥其音羽其數六其卦坎主燕趙代國主
刑獄險阻之事辰星所在有權智用兵爲主失其
時則寒暑失節國當大饑辰星出入必以陰雨不

則陰風、辰星又爲夷狄之事、及刑法之得失、皆於辰星觀之、又曰辰星出蚤爲月蝕、晚爲彗星、及天矢一時不出、其時不和、四時不出、天下大饑、失其時而出、爲當寒反溫、當溫反寒、當出不出、是謂擊卒、兵大起、與他星遇而鬪、天下大亂、出於房心間、地動、

元史云、辰星其行、常與日相近、一年一周天、四十六年、合於日者一百四十五、退合亦然、凡行一百一十五日八十七刻、又百分刻之、六十分而與日

順逆兩合

辰星在冬曰王色比奎大星青白精明而有光仲冬之時有芒角

在秋曰相其色精明無芒角不搖

在春曰休其色青黃微小無精光

在夏曰囚其色黃黑小而不明

在四季曰死其色青赤小而不明此其常也如其常則天下和平

當王時而有相休囚死色其畱守之舍國不祥其

進舍也與五星合天下有謀其退舍也五星及之不可舉事用兵、

當相時而有王休囚死色其畱守之舍其國破亡其進舍也與五星合其國有殃其退舍也五星及之不可舉事用兵、

當休時而有王相囚死色其畱守之舍其國多死小兒其進舍也與五星合天下有水其退舍也五星及之其國不可舉事用兵、

當休時而有王色夏雨霜雪有相色秋有暴兵有

休色流水湯湯有死色暴獄兵興其留守之舍五穀不生其進舍也與五星合有德令其退舍也五星及之不可舉事用兵

當死時而有王相休囚色其畱守之舍有疫其進舍也與五星合其年穀不登其退舍也國有兵不成行

辰星色比織女大星爲正青比左角黑比亢此常色也又曰辰星正色春當青黑夏當赤黑四季當黃黑秋白冬黑則吉其變色也色白而大兵起

辰星赤圓爲兵、赤角兵大起、黑角憂水有小戰、
辰星色黑三芒、天下有兵、兵止無兵、兵起有水災、
黃角有爭地、

辰星其時宜効不効爲失、其當効而出也、色白爲
旱、黃爲歲熟、赤爲兵、青爲疫、黑爲水、

辰星出東方、大而白、有兵於外、解常在東方、其色
赤、中國勝、外國敗、出西方、色赤、外國勝、中國敗、天
下無兵於外而赤、兵起、
辰星生角、有小戰、

辰星色黃而小出而易處天下之文變而不善色赤犯我城黃角地之爭

辰星之色春青黃夏赤白秋青白而歲熟冬黃而不明卽變其色其時不昌春不見大風秋則不實夏不見有六十日之旱月食秋不見有兵春則不生冬不見陰雨六十日有流邑夏則不長

辰星守舍列宿色黃爲敗常以冬壬癸日候之變色則爲災

武備志卷一百五十八